

barbarorum millia eam sub vernum tempus adorti, totum annum & amplius obsidione premere perseverarunt. Est id oppidum sub altissimo monte situm, quem *Crojanum* proximi incolæ vocant, in abrupto undique saxo: quo evenit ut omnes hostium conatus diu qui in urbe erant, frustrati sint, fuissentque diutissime frustraturi, nisi fames eos (ut postea dicemus) domuisset. Exierat igitur jam prima obsidionis ætas, processeratque aliqua autumnii pars: quum Veneti ad duo millia & amplius circa *Lyssum* coiverant, ut *Crojanis* laborantibus opem ferrent. Erant in his quingenti leves equites; erat & *Nicolaus Ducainus*, *Epirotici* sanguinis homo, vir inter suos populares multi nominis. *Italici* equitatus auctores erant *Antonatus Docius*, & *Lodovicus Tiphernas*: primos peditum ordines *Carolinus* ducebat & *Leo Illyricus*. Aderant & alii plerique viri fortes, quorum alii aliis centuriis præerant: hi postridie nonas *Septembris* ad hostem quadrato agmine ire pergunt. Habebat barbarus castra quatuor & amplius millia passuum a *Croja*, in planitie, quam incolæ *Tyrannam* vocant. Congressi igitur prælio, celeritate equorum fretus hostis, Venetam aciem turbare nitebatur. Contra Veneti pedites per occasionem extra ordinem pugnantes, ubi hostem cum cæde repulissent, ne forte a suis excluderentur, se inter confertos equites recipiebant: atque multi interim ex hostibus sagittis, aut plumbea glande cadebant. Et jam id certaminis genus a sexta diei hora ad vesperam se extenderat: quum barbari aperta fuga (vera ne an ficta, dubitari potest) effusi pro victis terga vertunt. Instat victor Venetus, eosque ad castra usque insequitur. His captis, quia omnis opulentia erant referta, confestim victor ad prædam discurrit, quam paucissimi victoriam prosequuntur. Ex oppido quoque facta repente eruptione, duo hostium castella, quibus illi vias ad urbem infederant, cum multo commeatu capiuntur, capta subito *Crojanis* evertunt. Sed ejus victoria læticia omnino brevis fuit. Nam dum *Contarenus* legatus & ipsi ductores consultant, deberent ne, puls-

*Veneti in Epiro ad Crojam prælio victi ingentem cladem accipiunt.*